

Jemsgo Aşəani Pas

Hasia nedebə tau sabo po

Te bidi nogi Jems, te aga Jisas aga amanu, te bidigo e pas aşəani. Agai homugo te haniani bulude bidibo Kraisgo po wali pabo Juda we bidi augwalibolo agai te augwa ebo kolesaga tigidali bugagia suao po wali. Haniani səgə augwaliba pedalobaso da, teda augwaligo te səgə dabe bugagia tolao wali. Tama tiyu, te tibo kolesaga egimio wali, te homu mu naga eyu, tama wiegi yai doloba pai kolesaga gasa we bidi dali yao wali.

**Dago te usu sabe səgə toloyu bomo elama dolalubaso da,
teda da God dali bugagia bidaibao po wali**

(Dqj 1:1-18)

1 ¹Ena Jems dao. Ena God dali, Genuai Bidi Jisas Krais dali sigo sə ebo bidi dao. Dage te Israel bidi hani nogo si olama, saçə badu si wali bidi hani bage, dagede eno homu kone paluyu, eno te pas aşəna tolobao. Dagego duga page bulu tagalama, tedela pelama, gasa haniani buluba polobadu bidigi pai. Tama eno dage dali dwagi yai homu eyu, e pas toloyu, dage tao obao.

Da bomo somainogo, bidi usu sabo səgə pedalaibao

²Eno ama dedeo, haniani səgə dagebolo pedalobaso da, teda dwagi yai homu yao. ³⁻⁴Dagego koneai, te səgə me deli dagebolo pedalamə, tama dagego te səgə bugagia toloyu, dagego te səgə aiyaba elalubo dao. Tama dage te tiwai idu geyu da, teda nosali asobo səgə tigidali aiyaba elaluaboo bomo elaluaibao. Tama tilama, dage bugagia bidaibao, te Godigo dwagi yai kolesaga me deli habuge egobeo, dage usu mu yaibao. Habuge idali weyu, bomo yao. ⁵Tialima, dage tomode te bidi me deli aga te sə yabo kolesaga habuge ebaso da, te agai God hanalu wao, dwagi yai kolesaga momainogo hanalu wao. Tama Godigo agabolo mawaibao. Wado po wagobeo, God agai tigidali bidibolo augwaligo hanalu wali nai mabo dao. Agai dwagi yai homu eyu augwalibolo nai olo mabo dao. ⁶Tiali goli te bidi aga səgə tolabo kolesaga habuge yai bidi agai Godibolo hanalu wabo

po wabo si, deli homu naga eyu hanalu wao. Agai te homu si elamu. Godigo te dwagi yai kolesaga ena magowe, ma magobewe, te homu egio. Magi basowe? Bidi homu si ebo bidi aga homu kolesaga te tamu aji asiyu, dini besela pabo tiwai dao.⁷⁻⁸ Tama te tobage bidi aga sesemane sogo homu si ebo dao, tigidali şede homu kolesaga besela pabo dao. Tama aga Godibolo po hanalu wabo tede me aga homu si ebo dao. Tama tibaso, bidi agai te homu elamu, Genuai Bidi agai ena magi nai me mawaibao, te homu elamu.

**Te bidi Jemsgo te magi nai doado bage meni yai bidide po dali
te nai doado bage hauwa munalubo bidi dali side po wali**

⁹ Te dage magi nai doado bage meni yai we bidi, dagego Godiba konealubo po dąq olama, tama dagego dwagi yai homu yao. Magi basowe? God agai dagego nogi ugwaba saibao. ¹⁰ Tama dage doado bage nai hauwa munalubo bidi dabe, dage me dwagi yai homu yao, God agai dage nai meni yai bidi tiwai bidimainogo yaibao. Te magi baso menio. Te nai hauwa munalubo bidi aga te noswai wiegi yai holobo tiwai elama, tama nosali te noswai ma isibo dao. Tama te tiwai te nai hauwa munalubo bidi isiyu tama tiaibao. ¹¹ Tama dago koneai. Te noswai plaua duduli wiegi yai au osogo elalubo dao. Giliga pedaliyu, te giliga posolo eyu, tama te noswai tigidali bogwa selama wa pabo dao. Tama te noswai tqba tulaluai, tama te noswaigo au yali dolobo dao. Te tiwai te nai hauwa munalubo bidi me aga te tigidali şe yali nai dabe tagalama, tomode isiyu, te nai walu doado bage taga pabo dao.^a

God agai dago dwai şe emainogo sinabo menio

¹² Niwai bidi me aga dali te dwai şe yanama sinayu bomo ebadi tama te bidigo dwai şe emainogo te bidi me deligo te dwai şe yao po weyu da, te bidigo te şe isiąma, te bidi aga bomo elama te dwai şe aiyaba elalubaso, te tiwai bidi aga dwagi yai homu eyu bidaibao. Magi baso meni. Agai te dwai şe usu sabo sogo aiyaba elaluama, tama Godigo aga bidabo ula mawaibao. Godigo te po polobadu wai dao, “Niwai bidi agai ena dali dwagi yai homu eyu, godolo mu ebo bidi agabolo te bidabo ula eno mawaibao,” te po wai dao. ¹³ Tama bidi aga homude dwai şe yabo homu hodobaso da, agai te po olamuo, “Godigo enabolo ‘Dwai şe yao’ wali.”. Te menio. Dwai şe ebo homu God agai homu kolesagade pedalobo menio, usu egobeo. Tama tibaso, Godigo te bidibolo ‘Dwai şe yao’ wagobeo, te tobage po agai wabo menio. ¹⁴ Tiali goli tigidali bidi deli deli augwa homugo digi te dwai şe yabo homu hodolobo dao, tama dago te dwai şe emainogo te dwai homu kolesaga tomode dabolo te ili po wabo dao.

^a 1:11 Ais 40:6-7

¹⁵Tama tiyu, tama te dwai sę ebogo bidi homu hodolama, tama te dwai kolesaga hauwa eyu, te wego wai ame nainogo haliga ebo tiwai elama, tama nosali te dwai sę haniani hauwa eyu, tama te dwai kolesagago wai hauwa ame nai. Tama nosali te dwai sę ebo genuai mu pedalama, tama te dwai sę ebogo te bidi dolama, tama bidi te sęgo isibo tiwai pedalainaibao.

¹⁶⁻¹⁷Eno dwagi yai ama dedeo, dagego homu te dwai sę ebode geda mugimio. God agai we bidi dwai sę yao olama sinabaso, te dwai sę ebo menio. God agai te dwai sę egobeo. Te menio. Te Godigo tigidali dwagi yai olo mabo kolesaga me, te tigidali agai da mabo nai te dwagi yai mu dao, tama te dwagi yai sę tigidali dagaludu asobo dao. God agai naga te dagalude ula ebo nai tigidali nigali bidi, agai te dabolo dwagi yai sę naga tqba mabo dao. Tama God Aya agai te kolesaga subigila hasegelebo menio. Aga te magi nai me giligade noma pedalobo tiwai eyu, tama te noma bobobage elama, pewadage ma eyu ebo, God agai te tiwai egobeo. ¹⁸Agai aga homu kolesaga naga wali peyu, agai mu po dabolo ola menama, tama da aga hani mu tiwai dao. Te da aga hani tomode te gomunai bidi tiwai bidimai hagede agai da nigali. Te Godigo da nigliama, te tigidali gasagi yai nai dabego gomunai bidi dabe bidiyu, te dago te nai dabe tonalumainogo yai dao.

Te dago konealubo homu Godiba dąq wabo si da, dago te wiegi yai kolesaga dabe me yaibao

(Daq 1:19–5:6)

Dago po odama, wali piąo

¹⁹Eno dwagi yai ama dedeo, dagego e po pagede bugagia kone palama, koneao. Dagego te po odabo homu sisi elama, wabo po odao. Te dagego polo asesa te po weyu, tama dagego polo wado po wabo homu olamu dao. Dua yao, sębę polo egimio. ²⁰Magi baso menio. Bidigo sębę ebogo te Godigo gedude wiegi yai doloba pai kolesaga egobeo. ²¹Tama tibaso, dage deli deligo aga me ebo dwai dwai kolesaga tigidali mu sela sayao. Tigidali dwai sę ebo homu me te tagalama, te tobage sęde digibulu bida. Tama duga digi duga nogi aiyaba elalua, te Godigo po dagego homude bulali po sao. Te po aga digi usu elama, dage tau siyu ma saibao.

²²Dagego Godigo po dagego ologo naga odogimio. Ologo naga odoyu da, teda duga digi dugabolo ili po te ola mobao. Te egio. Dagego te Godigo po odama, mu wali pao. ²³Niwai bidi agai Godigo po ologo naga odama, agai te po wali pisama ebo bidi, te aga digi gesabidi te duluade subo bidi tiwai dao. ²⁴Agai aga gesabidi polo sulama, tama bedu buluba teda pelama, aga gesabidi suali ma polo gegeda pabo dao, eno gesabi mena tiwai suali wagawe homu ebo dao. ²⁵Godigo wiegi yai doloba pai

bomo yai po te bomo yai pogo da we bidi tau siyu, tama da bugagia bidiyu, tama da magi nai mego da kalabuside bidibeo. Tama niwai bidi me agai te Godigo bomo yai po page bugagia osola susa pelama, tama te bidi agai te po olo naga odola tagalobeo, menio, te bidi agai te bomo yai po wali pabo dao. Te tiwai bidi Godigo tau siyu, tama te bidi aga bugagia bidiyu, aga ebo sede tigidali aga homu wiegi yai yaibao.

²⁶ Te bidi me deli agai homu ‘Ena te baptais sali dwagi yai bidi dao, hauwa sogo eno lotu po wabo dao,’ te homu ebo bidi dao. Tiali goli agai bidi dene mabo dwai po waidali weyu, agai aga pedauwali bugagia tonalubo menio. Tama tiyu da, geda muyu, aga digi aga homugo agabolo tibo po naga wabo dao. Agai te baptais olo sali, agai lotu po wabo te olo po naga wabo dao. ²⁷Godigo gedude bidi agai wiegi yai kolesaga eyu, agai po bugagia odobo bidi agai magi dwai se isabo bidi, agai e tiwai kolesaga si yao: te kolesaga me e dao, niwai wai dabe meba augwa aya de ida si isiyu, tama te tiana wai dabe augwaduba naga bidibaso da, te me bidi isiyu we taga pai agaduba bidibaso me, te dago te tiwai wai dabe me, te wilawe we me augwali magi nai meni baso te sege sobadi tau sao. Te me kolesaga e dao: dago dena bilibo kolesaga bugagia tonalua bilao, tama e tqde meda yai dwai kolesagago dago homu kolesaga dolidali weyu.

Dago tigidali bidibolo homu deli naga tiwai yao

2 ¹Eno ama dedeo, dagego dago Genuai Bidi Jisas Kraisde duga homu tigidali muyu bidibao. Aga genuai tobolu bidi mu dao, moni nogi me, moni ula yai bomo me elalubo dao. Tama dagego Jisasde konealubo po dą̄ waligo da, teda dagego te nogi yai bidibolo naga dwagi yai se eyu, te olo nai meni yai bidi dagego tudiba muyu, te kolesaga munu me egio. ²Te bidi me deli agai wiegi yai tedela ugwa gudama, tama aga nogode te nogi wabo dwagi yai nai ring munama, tama te bidi aga dagego lotu be tomoba asiyu, tama me te nai meni yai bidi aga me meda yai ugwa gudasa dagego te lotu be tomoba asobadi da, ³tama dagego te dwagi yai ugwa gudai bidibolo te po weyu, “Nage te dwagi yai ni namide duayao,” te po wai. Tama te ugwa meda yai bidibolo dagego “U badu dolaluao, tama nage ena pagede degedude dulaluao,” te po wai. ⁴Tama dagego te bidi si dali te tobage se eyu da, teda dagego duga ama dede dagego homugo augwali osalama, dagalobao. Tiali goli dagego te kolesagade geda muyu, dagego bugagia dagalobeo. Dage te bidi po tu dodolobo bidi jasgo dwai homu elalu te bidi dabe po tuqe dagalabo kolesaga tiwai dagego homude me gagabo. Tegio.

⁵Eno ama dedeo, eno dagebolo dwagi yai homu eyu, godolo mu ebaso, eno dagebolo te po obao. Bugagia odao. Te tqde tigidali bidi gedude magi nai meni yai bage, te Godigo te tiwai bidi sa munama, tama augwaligo te Godigo po dą̄ waligo te augwaligo te homu kolesagade te masigi me

walu hauwa munalubo bidi tiwai yaibao. Te polobadu Godigo tama po wai, "Niwai bidi agai homu enaba muyu godolo ebo bidi, te aga eno we bidi bugagia tonalubo madi tomoba asagameo," te po wai. Tama tiyu, agai te magi nai meni yai bidi augwali sa muyu, augwaligo te Godigo po mu dą̄ waligo da, te augwali te dą̄ ilali madi te pesage saibao. ⁶Tiali goli dagego te magi nai meni yai bidi augwali gisugu mabo dao. Tama dagego bugagia kone palao. Te walu hauwa munalubo bidi augwaligo Godigo po wali pisiqbadi, augwaligo dage dali dwai sę haniani eyu, tama dage aiyaba elaluama, tama dagebolo seğe mabo dao. Tama te bidi dabe augwaligo naga dage te po tü ebo digi kegasa pabo dao, augwaligo dagego nai somainogo. ⁷God agai dage ma selama, tama agai dageba Jisasgo dwagi yai nogi muai dao. Tiali goli te walu hauwa munalubo bage augwaligo te nogi posobo po wabo dao.

⁸Te dago genuai tuni bidi God agai bomo yai po me deli bukude polobadu mu aseyu, te po wai, "Nago naga tigi dali dwagi yai homu eyu, godolo ebo tiwai, nago gasa bidi dali me tama naga tiyu, tama nago te bidi dali wiegi yai homu yao," te polalubo bomo yai po aşəani. Tama tiyu, dagego te bomo yai po wali peyu da, te dagego wiegi yai kolesaga naga wali paibao. ^b ⁹Tiali goli, dagego bidi deli dali wiegi yai homu eyu, tama bidi me bidi dali dwai homu eyu da, te dage dwai seğe saibao. Tama tibaso, te bomo yai pogo dage homude dene iliyu, tama te dene dagego mu siyu, tama dage te dwai sę eyu bomo yai po bolobo bage dao olama, tama dagego te sęde mu koneaibao. ¹⁰Tama bidi me deli agai tigidali gasa bomo yai po wali peyu, tama agai te bomo yai po me deli naga bolali, te bidi agai te bomo yai po tigidali bolali bidi te tiwai dao, te seğe saibao. Magi baso meni. ¹¹Te God agai te po wai, "Nago te we sabo kolesaga dologio." Tama agai te pogo naga te po me weyu te po wai, "Nago bidi ela mugio." Tialima, nago te we sabo kolesaga dolisiyüy da, tama nago te bidi me ela mugi sogo da, te nage te bomo yai po bolali bidi dao wagıda. ^c ¹²Tama tibaso, dagego te nosali pedalabo sę homugo koneao. God agai te bomo yai po deligo da bugagia bidimainogo ebo dao. Tama te sogo Godigo tigidali tqde we bidi te bomo yai po deligo naga osalama dagalaibao. Tama dagego homugo te tiabo koneama tama duga po wabo me, te bidibo kolesaga me te bugagia duga tonaluao. ¹³Magi baso menio. Bidi me deligo gasa bidi homu dene eyu tau sisayıy bidali, tama te sogo Godigo we bidi dagalobode, te gasa bidi homu dene esiayıy tau sisayani te bidi aga Godigo homu dene eyu tau sogobeo. Te menio. Tiali goli, niwai bidi agai gasa bidi homu dene elama augwali tau sali te bidi, te usu da, Godigo te bidi tau siyu, tama te Godigo bidi dagalobode te tiwai bidi aga te po tü dali te seğe me dene sogobeo. Te menio.

^b 2:8 Prs 19:18 ^c 2:11 Sai 20:13, 14; Bom 5:17, 18

Konealubo po wiegi yai kolesaga dali esiayu te isibo dao

¹⁴Eno ama dedeo, bidi mego te po weyu “Eno Kraisde konealubo po dą̄ wabo dao” weyu da, tiali goli agai wiegi yai kolesaga mu isiawai, tiali ma te bidigo konealubo po te olo nai tiwai yai. Tama te tiwai konealubo pogo aga tau siyu ma sogowe? Menio. ¹⁵Tama tiyu, ama me abe augwali te ugwa dwai eyu, tama tuabo nai me menio. ¹⁶Tama tibaso dage tomode bidi me deligo te magi nai meni yai bidibolo te po weyu, “Nage homu wiegi yai elama bida,” te po olama, “tama nage pelama naga tigi posolo ilabo ugwa mugi peyu, tama naga nai selama tuyu naga haliga pagqanao.” Tama dagego te po weyu da, te dagego te nai meni yai bidi ugwa me te nai me te bidi tigi tau selama masiayu da, tama dagego te po wabogo te bidi mena tama aga tau sogowe? Te meni. Te usu egobeo. ¹⁷Te tiwai gilama, te Jisasde konealubo po dą̄ wabo tama naga ebo dao. Tama tibaso, te bidi aga olo bidiyu da, te tebo kolesagago magi dwagi yai sę me pedalisiayu, tama te olo dwai nai tagalobo tiwai sę yaibao. ¹⁸Te bidi mego te po wali, “Ao, eno Jisasde konealubo po dą̄ wabo dao,” wai. Tiali goli agai gasa we bidi tau siyu wiegi yai sę ebe, tama te tiwai bidi dali eno tama po waibao, “Nago pogo naga te konealubo po dą̄ wabo po wai, tama eno da, te eno we bidi tau sabo kolesaga ebo dao. Tialima, eno te dwagi yai kolesaga ebo suyu da, te sogo nago koneyu eno Jisasde konealubo po dą̄ wabo mu koneaibao. Tiali goli nago wiegi yai kolesaga ebe, tama mena tama eno nago te konealubo po dą̄ wabo koneaibawe? Te tū menio, eno konegobeo.” Eno te po te tiwai bidibolo waibao. ¹⁹Tama nago konealubo po dą̄ wabo homu tama yai, “Te God deli digi bidibao,” wai. Te homu wiegi yai dao. Tama tiali goli te usu menio. Te dwai haubo noma bidi augwaligo me te homu tiwai ebo dao, tama te pode augwali homu didibili eyu midigi sabo dao. ²⁰Nage homu kolesaga meni yai bidi, te nago konealubo po naga dą̄ weyu, tama nago wiegi yai kolesaga dali esiayu, tama nago te konealubo po dą̄ wabo te olo nai tiwai eyu te usu menio. Tama tibaso, nago te po page mu koneai homu ebawe? ²¹Edao. Dago wą̄j Abraham agade kone palao. Polobadu Godigo agabolo “Te sę yao” po olama, Abraham aga ogwa Aisak te masigi saiba munama elainogo, tama Godibolo te ogwa te olo mabo tiwai yainogo tiwai. Tama te sogo Godigo agai te kolesaga ebo sulama, tama “Abraham aga wiegi yai doloba pai bidi mu dao” wai.^d ²²Dagego suo. Abraham agai Godigo “Nago ogwa enabolo mao,” wali po bugagia wali peyu, tama te yali wiegi yai kolesaga aga konealubo po dali sę eyu, tama te dwagi yai kolesaga yaligo te agai konealubo po Godide dą̄ wabo te usu mu eyu, te habuge me ebeo. Menio. ²³Tama tiyu, Abraham agai tama tiai, tama

^d 2:21 Gag 22:1-14

nosali Mosesgo te Godigo po meba te bukude agai aşəai, “Abraham agai te Godigo pode konealubo po dą̄ wai. Tama tibaso, Abraham aga te Godigo gedude wiegi yai doloba pai bidi mu pedalai,” Mosesgo tama po aşəai. Tama me, te Godigo Abrahamde dali te po wai, “Aga eno abagi dao.”^e ²⁴Tama te wali pode te Abrahamgo yali kolesaga te po dageko koneao, te bidi mego konealubo po naga dą̄ weyu, tama agai te wiegi yai kolesaga ebo po wali pisławai, te tiwai bidi Godigo wiegi yai doloba pai bidi dao wagobeo. Menio. Niwai bidigo te wiegi yai yai kolesaga dali eyu konealubo po dą̄ wabo bidi, te Godigo gedude te tiwai bidi te wiegi yai doloba pai bidi dao waibao.

²⁵Tama dago Godigo gedude doloba pai we bidi bidabo kolesaga sao, te polobadu we mego po wali, te we nogi Rahap. Te we aga penani we, tialima Godigo te Kanan t̄q Juda bidi hanibolo mawainogo yali sogo, tama augwaligo te Kanan t̄oba sa pabo bidi dabe tagala palai, te sogo te we Rahap agai te bage tau sai. Te we aga hanigo augwali elidali weyu, tama te we Rahap agai te bidi dabe dualama, gasa t̄du Juda bage bidibo digiba tagala palai. Tama te wego te yali səde, te we aga Godigo gedude doloba pai mu pedalai dao.^f

²⁶Tama te bidi Abraham dali te we Rahap augwali sigo yali səde dago koneabao, tama niwai bidigo agai konealubo po naga dą̄ weyu tama wiegi yai kolesaga esiayı da, teda agai Godide konealubo po wabo isali tiwai dao, te bidigo tigide bidibo noma bidi meniamma, tama te bidi isai tiwai yaibao.

Dago dena wabo po bugagia tonaluao

3 ¹Eno ama dedeo, dage tomode Godigo po ola mabo bidi hauwago te po ola magio, bidi si sela naga usu yaibao. Dago konebo dao, nosali Godigo agai we bidi dagalobo sogode, agai da te po ola mabo bidi dabe agai da bugagia dagalama, osola sueibao. Tama dago dena s̄e bugagia esiayı da, teda agai dabolo s̄ege mawaibao. Tiali goli te sogo agai po odali gasa we bidi te agai dua digi augwali bugagia dagalama osola sueibao. ²Tama hauwa sogo da tigidali bidigo te pode geda muyu haniani s̄e ebo dao. Tama tibaso, bidi mego agai wabo pode dwai s̄e me esiayı da, te aga te wiegi yai bidi mu dao. Tama te bidi aga tigigo ebo s̄e tigidali bugagia tonaluyu te bidi usu yaibao.

³Tama dago dena wabo po bugagia tonalubo s̄ede eno te po obao, dago te moni kibu hos kelede ain dage munama, tama te ain bonogo kegeyu, tama te hos aga dago ebo homu kolesaga wali bilimainogo tebo dao. Tama tiyu dago aga genuai tigi tigidali kegasa biliyu, tama da bidigo homu kolesaga wali hosgo pabo dao.

^e 2:23 Gag 15:6; 2 Sto 20:7; Ais 41:8 ^f 2:25 Jos 2:1-21

⁴Tama dagego homugo te moni geba sip, tede me bilibo kone palao. Te moni geba sip te genuai nai mu dao, tama tiyu bomai waligo te sip selasa, te tamu qıđu bilibo dao. Tama te sip tolasa bilibo nai te dwasianu nai mu dao. Tiali goli, te sip tolasa bilibo bidi agai homugo gasaba painogo da, te bidi agai te sip tolasa pabo nai teba begelama pabo dao. ⁵Te tiwai gilama, te da bidigo kele te dago tigide elalubo dwasianu nai dao. Tiali goli te kelego genuai po hauwa wabo dao, tama te wali pogo genuai sę ebo usu dao, te sę meba dwagi yai dao, meba dwai sę dao.

Kone palao, te dwasianu sia dabogo te genuai sia mu deyu, tama te bulu tomode elalubo ni dabe tigidali te siago dainogo ebo te dagego konebo dao. ⁶Te sia dabo tiwai da bidigo kelego wabo po tiwai dao. Tama te sia dabo tiwai, dago wali dwasianu dwai po te genuai mu pedaluama, dago tigi tomode dwai meda mu elama, tama da dolobo page elalubo. Tama dago wabo dwai po aga page bulu da te Satan aga moni dwai sia dabo bulu dao. ⁷Tama tigidali tqde bidibo bidi augwaligo te bulu tomode bidibo wili hasa dabe sobadi, te ba me, te hasamani me, tama te tigidali tamu qıđe bidibo nai tigidali sai. Tama augwaligo te hasa dabe tigidali negelama tama nagame ilibaso, tama augwaligo po odolama bugagia bidibo dao. Tama megı me bidi dabe augwaligo tama tebo usu yaibao. ⁸Tiali goli mena bidi deli agai kele bugagia tonaluabawe? Te tobage bidi menio. Sesemane sogo bidigo kelede dwai po haniani subigila homu hodolama, te dwai po wabo dao. Tama dago kele da te bidi isibo nai elalubo bidi gąų kelebo dwai hasamani tiwai dao, dago wabo pogo we bidi dene mabo dao. ⁹⁻¹⁰Tama dago kelego naga po weyu, te dago po si wabo dao. Po me deli te dago Genuai Bidi dali te dago Aya God te augwali sigo nogi dago ugwaba sabo dao. Tama gasa po me dago kelego dwai po weyu, meba bidi dabe dalı posobo po olama dolobo dao. Tiali goli, God agai tigidali tqde we bidi aga tigi tiwai nıgaligo da, Godigo nogi ugwaba sabo po dali, te bidi posobo dwai po wabo dali, te tiwai po si dago deli kelego olamu. Eno ama dedeo, te dwai po wabo tagalao.^g ¹¹Te qıđe kone palao. Te dwagi yai asobo ulu wę dali te tamu aji dali gelama asobo menio. ¹²Ama dedeo, te ni kayago te ni oliv du walogobeo. Tama te bono du ni wain tego te ni kaya du walogobe. Tama tiali me, te tamu aigo dwagi yai aji ma gagagobeo. Menio.

Dwagi yai homu kolesaga God pagedu asobo po

¹³Te dage tomode bidi me deli agai wiegi yai homu eyu, te dwagi yai po konebawe? Te dage tomode te tiwai bidi me deli bidibaso da, te bidi agai bilibo kolesaga dwagi yai yao. Tama wiegi yai kolesaga eyu dwai kolesaga isıqma, tama dwagi yai kolesaga ebo koneyu, tama agai

te dwagi yai kolesaga ebo gasa bidi dabe augwalibolo ola mao.¹⁴ Tiali goli, dagego dwai homu gasa we bidi dabe dali elaluyu, tama dagego augwaligo nogi ugwaba sabo eno hagelabo homu eyu da, tama dage nai yogo homu eyu da, dage te tobage dwai homu eyu da, teda geda muyu dagego te po wabo dao, “Da da, te wiegi yai homu eyu, te dwagi yai po konebo bage dao.” Te tobage tibo po wabo tagalao, duga nogi ugwaba sabo po wagimio.¹⁵ Tama dagego te gasa we bidi dali dwai homu eyu, tama duga digi duga nogi ugwaba siyu ebo, te tiwai kolesaga te dagaludu asobeo. God agai te tobage kolesaga dabolo mabo menio. Tama te homu ebo dwai kolesaga te e tqde we bidigo homugo naga ebo kolesaga dao. Te dago dwai tagalai s̄e ma eyu, tama te dwai s̄e ebo page bidi te Satan dao.¹⁶ Tama tiyu, bidi meba augwaligo gasa bidi dabe dali dwai homu eyu da, tama augwaligo te haniani kolesaga ebode te augwa digi augwa nogi ugwaba siyu da, te tiwai bidi dabe augwaligo konila po subigila wabo bidi dao, te haniani dwai s̄e ebo page bidi dao.¹⁷ Tiali goli niwai bidi augwaligo te God pagedu asobo te wiegi yai homu kolesaga sabo bidi dabe augwaligo ebo kolesaga e dao: polasa mu, te augwaligo meda isiąwai wiegi yai homu kolesaga wali pabo dao. Tama te kolesaga me, te augwaligo gasa bidi dabe dali wiegi yai kolesaga eyu deli homu elama bidiyu, tama augwali dali homu nagame eyu, tama tiyu augwaligo gasa bidi dabego po wabo odobo dao. Tama augwaligo homu dene eyu, we bidi tau sabo wiegi yai kolesaga ebo dao. Tama tiyu, augwaligo deli homu tiwai naga tigidali we bidi dali ebo dao. Tama augwaligo ugwdadu homugo naga augwaligo po wabo menio.¹⁸ Tama tiyu, dago wiegi yai kolesaga eyu, deli homu naga elama bidiyu da, te s̄e ebo dago te nai ge tqba bulubo tiwai dao. Tama dago te wiegi yai kolesaga eyu, te deli homu naga ebo te kolesaga ebode te nai ge dwagi yai walobo tiwai yaibao, te doloba pai kolesaga ebo genuai pedalaibao.

E tqde ebo kolesaga godolo ebo bidigo te God dali boi bidi ebo dao

4 ¹Te duga hasi te boi bidi yabo homu dali, te wado po wabo homu dali te si menadu pedalobo dawe? Woo, dage bidi deli deligo magi nai sulama, te nai eno tigi tau somainogo, te saio homu eyu, dini ebo dao. Te tama te ebo sego dagego homu hodolama, tama homu si eyu, tama duga hasi konila po weyu, wado po idu gebo dao. ²Dagego te haniani nai sabo homu godolo yai, tiali goli dagego sabo menio. Tama tiyu dagego te bidi ela muabo homu ebo dao. Tama dagego nai sabo homu eyu pes̄ eyu, tama dagego te nai sis̄ama, tama dagego wado po weyu hw̄ibo dao. Tama me sogo dagego Godibolo nai sainu po hanalu wasiąbaso, dagego te nai sabe dao. ³Tama me sogo dagego Godibolo te nai sainogo po hanalu obadi digi, dagego te nai sabe dao. Magi baso menio. Geda muyu, dagego homu dolo pisiąwai, dwai s̄e emainogo, duga tigi tobade, duga haliga tobade

naga te nai sai hagede te dagego homu dą̄ ola sabo nai sainu te dagego God te naide hanalu wabo dao. Tiali goli agai dagebolo mabe.

⁴Dage te penani ebo we tiwai dao, te we aga bidi dali bidisiąyu, gasa bidi dali penani ebo tiwai dao. Niwai bidi agai e tőde ebo kolesaga naga godolo eyu da, teda te bidi aga God dali boi bidi homu ebo dao. Te dagego konebewe? Tama tiyu, niwai bidi agai te tőde kolesaga ebo bidi dabe dali abagi weyu, te bidigo aga digi te God dali boi bidi gagawai. ⁵Dagego te polobadu bidali bidigo aşəani pode ma kone palao, te pode geda mugio. Te aşəani po e dao: “God agai aga Mobo Bidi da dali bidimainogo tagala palali. Tama tiyu, da God taga peyu da, te Mobo Bidi agai bomo eyu, da dali dwai homu ebo dao,” te po Godigo po bukude bidi mego aşəani. Te pode dagego “Te po olo po naga dao” homu elamu. ⁶Tama God agai aga Mobo Bidigo dabolo mabo sę te genuai dao. Tama agai da olo mu tau sabo sę, te genuai mu dao. Tama tiyu, agai da olo tau siyu, te dago homude pedalobo ‘Dwai sę yao’ po te po dago odosı̄ama, tama dago te po aiyaba elalubo dao. Tama te sę ebode te Godigo wali po bukude te po elalubao, “Te aga digi aga nogi uwgaba sabo bidi, te bidi God aga tudiba mubo dao. Tiali goli te imilai bidi da, te bidi God agai olo mu tau sabo dao,” te po aşəani.^h ⁷Tama tibaso, dagego duga dwai kolesaga ebo te homu aiyaba dualao, tama dage Godigo bomo dologode bidao. Tama tiyu, dagego te Satango dwai sę yainogo ebo dagalama sela saya, tama agai dage dali te dwai sę yainogo yali tagalama Satan aga wi paibao. ⁸Tama tiyu, dage God pą̄ba mu peyu tibaso da, aga dage pą̄ba mu aselama, bidaibao. Tama dage te dwai sę me sogo me sogo ebo bidi dabe, duga nogogo dwai sę ebo tagalama, dwagi yai sę naga yao, te bidigo nogo ą̄jde telabo tiwai te meda meniamma dwagi yai tiwai yao. Dagego te Godigo po wabo odobo me te tőde kolesaga ebo te homu si elalubo, te dwai homu ebo kolesaga dagego homude elalubo te sela saya, homu deli naga eyu bidao. ⁹Tama duga te dwai sę ebo kolesagade homu sęge eyu tama gela hauwa waiyao. Tama dagego megı̄ tama tebo kolesagade dagego dwagi yai homu eyu gisugu wai, tama dagego te dwai sęde gisugu wabo te kolesaga hasegelama, tama duga te dwai sę yalide homu begeleyu gela wao. Tama dage te megı̄ naga wiegi yai homu te dwai sęde ebo bidi dabe, dagego te homu ebo hasegelama, tama duga te yali dwai sęde hale eyu homu dene yao. ¹⁰Tama duga digi duga nogi Genuai Bidigo gedude aiyaba dualao. Dagego tama tiyu da, te Genuai Bidi agai dagego nogi uwgaba saibao.

Dena ama dali dolabo po olamu

¹¹Ama dedeo, duga hasi bidi dolabo po dagego wagimio, te tagalao. Niwai bidi agai aga abagi dali te nogi posobo po weyu, “Nage dwai sę

elama, tama sęgę sao,” te tobage po weyu da, te bidi agai Godigo bomo yai po me posoyu, te bomo yai po dolai dao. Tama nago te Godigo bomo yai pode posobo po weyu da, teda nage te bomo yai po odoyu wali pabo bidi me menio. Nago te bomo yai po osola sulama, tama ‘Te bomo yai po usu ebe’ homu eyu, nago te bomo yai po bolobo bidi dao.¹² Tiali goli, God aga digi naga agai bomo yai po dabolo mawai dao. Aga digi naga we bidi osola suabo bidi dao. Aga digi naga agai we bidi tau siyu ma sabo bidi dao, ma we bidi mu dolabo bidi dao. Tama tibaso, we bidi osola suyu sęgę mabo sę te nago sę mu menio.

Dago dwai sę egio wabo po

¹³ Dage meba bidi dagego te po wabo dao: “Megi me, do me, da te hanu meba pelama, tama te hanude dago bisnis sę eyu, kibu be deli bidaibao. Tama dago mone ge hauwa saibao,” te po dage mebago wabo dao. Tialima eno dagebolo te po obao: ¹⁴ Dagebolo magi nai te do pedalabo te dagego konebeo. Tama dagego bidibo ula te mena tiwai dawe? Te dagego bidibo ula e tiwai elalubao te kigamu pę holama, tama te giliga asobode te po polo hagabo tiwai, te da bidigo bidibo ula te tiwai osogo naga ebo dao.ⁱ ¹⁵ Tama tibaso, dagego nosali yabo sęde homu eyu, te po wao, “Genuai Bidi agai ‘Ao, usu da’ homu eyu da, te da bidibo ula dali bidiyu, tama dago te masigi sabo sę me te gasa sę me te nosali yaibao.” ¹⁶ Tiali goli dagego te tiwai ebo meni. Dagego genuai po dagą olo dali ola biliyu, tama dagego nosali yabo sęde duga digi nogi ugwbaba sabo po wabo dao. Te tobage nogi ugwbaba sabo po wabo te dwalio.

¹⁷ Tama tibaso, bugagia kone palao. Dwagi yai kolesaga ebo koneai bidi, tama te bidi agai te dwagi yai sę esiayı da, te bidi agai dwai sę yali dao.

Te walu hauwa munalubo bidi dabe dali wali po

5 ¹ Megi eno te dage walu hauwa munalubo bidi dabe dali te po obao. Dage dwai homu eyu, te hwa weyu, gela weyu yao. Dagebolo moni dwai sęgę dali, dene dali si tamadi pedalaibao. ² Tama dagego te wiegi yai walu dali te au dobage te nai dabe tigidali te dolama, tama damua pai dao. Tama dagego te ugwa dabe me tigidali, te asibago me te sagado dabego tula silai. ³ Tama dagego te wiegi yai kapa nogi gol te golgo nigali nai dali, te kapa nogi silva si te wiegi yai nai dabede nai yogo ebo homu eyu, te nai dabe olo munaluyu, te yaba yai. Tama te nai si yaba ebo gilama te dagego dwai sę ebo te hania pedaliyu, tama te naigo dagego tigi te sia ulubo tiwai yaibao. Dagego megı bidiyu, te walu me te mone ge hauwa sisinibao. Tiali goli te Genuai Bidi aga ma asobo sogo pąde

ⁱ 4:14 Prs 27:1

dao. Tama tibaso, megi da te nai deliba sisinabo sogo menio.^j ⁴Te po bugagia odao. Te sé ebo bidi dabe augwaligo te dagego moni gide dagego nai sabo sé yai. Tama dagego augwali ili po weyu, te augwali maiabo mone ge bogia siyu, tama meba duga geme halobageba dualobo dao. Odao. Dagego te geme dualali masigigo agai i olama, dwai po dage dali wabo tiwai po wabo dao. Tama te sé bidi dabe augwaligo masigi habuge eyu, dwai homu eyu, tama augwaligo i wabo te dagalude bidibo Genuai Bidi agai odalio, God aga tigidali bomo page bidi mu dao, te aga digi augwaligo gela wabo po odalio.^k ⁵Tama tigidali sogo dage e töde bidibo sogo, dagego dwagi dwagi yai nai siyu, tama dage homu dwagi yai naga eyu bidai. Tama dage nai hauwa tuyu genuai bidi nisai, tama dage elabo bodolu te paba pedalai dao, te nisai genuai kibu tamadi elabo bodolu paba pedalobo tiwai dao. ⁶Dagego te wiegi yai doloba pai bidi dabe po tu elama, te bidi dabe augwali ela muai. Tama dagego augwali dali te dwai sé ebadi yaide, augwaligo dage dali po wei ponobo usu ebeo.

Da bomo elalu bidu te Godiba gedu haluasa po weyu tama Genuai Bidi asobo tonaluinao

(Dqj 5:7-20)

Dago homu däü olama te sége toloyu, Genuai Bidi ma asobo tonaluao

⁷Eno ama dedeo, te walu hauwa munalubo bage augwaligo tama tiyu, dagego homu däü olama, dagego te tigidali sége toloyu, tama te Genuai Bidi Jisas ma asobo tonaluao. Dagego koneani, te gi page bidigo te aga gide bulali nai dwagi yai holobo tonalubo dao. Tama te bidigo homu däü olama, moni homu esiäyu, te tulubage dali te giliga dali sigo sé usu ela silibo si, tama te bidi aga te gide te wiegi yai nai sabo dao. ⁸Dagego me tama duga homu kolesaga däü olama, te tigidali haniani sége tolao. Tama te Genuai Bidi ma asobo sogo te paba yagasobao. Tama tibaso, dwagi yai homu eyu, dagego homu kolesaga däü olama tonaluyu bidao.

⁹Eno ama dedeo, te po tu ebo bidi Jisasgo dagebolo dwai dene wei ponoidalı weyu, duga hasi te gasa ama dabe dali wado po weyu, augwali dali te posobo po olamu dao. Dagego e po odao. Te po tu ebo bidi Jisas te be tu bulu badu dolagasai elalubao. ¹⁰Ama dede, dagego te polobadu Genuai Bidigo nogide po pusali bidi profet bage augwali dali yali te sé homugo koneao. Te bage dali gasa bidi dabe augwaligo boi bidi homu eyu, augwali dali dwai sé yai. Tiali goli te profet bidi augwaligo homu kolesaga däü olama, te sége bugagia tolai dao. Tama dagego augwaligo te yali kolesaga suyu, te kolesaga dagego usu ni tiwai dao. Tama dage te usu

niba kadu wao.¹¹ Tama te tiwai augwaligo te sęgę polobadu bugagia tolai baso, megi dago tama po wabo dao: “Te homu kolesaga dąu olama te sęgę tolali bidi dabe, te bidi megi augwaligo homu wiegi yai eyu bidibao.” Tama gasagi yai bidi me agai nogi Jop, agai yali sę po dagego odai. Te genuai sęgę hauwa te agabolo pedalali digi te agai bomo eyu dolalu, te sęgę te aiyaba elaluai. Tama nosali Genuai Bidigo dwagi yai kolesaga aga dali yai, te me dagego koneai. Tama te bidi Jopde yali sę po odama, tama dago koneani, Genuai Bidi agai da hobede mu eyu, tama sesemane sogo agai da homu dene elama, da agai dwagi yai homu eyu, da olo mu tau sabo dao.¹

Dago po wabode dago Godigo nogi olo weyu da, te dwalio

¹² Ama dedeo, dagego polasa te yabo sęgę sę e dao: Dagego te God aga bidibo madi dagalu me, tq me, te gasa nai me nogi eyu, tama dagego te po wabo dao te pogo dąu wagimio. Tama dagego “Awe” weyu duga wabo po dąu walomainu, “Awe” naga wao, te usu yaibao. Me ma, dagego mu po weyu, “Menio” weyu, duga wabo po dąu walomainu, “Menio” naga wao, te usu yaibao. Bidi mego aga wabo po dąu walomainu Godigo nogi weyu da, te bidibolo Godigo sęgę mawaibao. Tama Godigo dagebolo sęgę maidali weyu, dagego te Godigo nogi olo nogi igio.^m

Dwagi yai doloba pai bidigo Godibolo hanalu wabo po te bomo elalubao

¹³ Te dage tomode bidi me deli aga te sęgę tolobawe? Tibaso da, agai te Godibolo gedu haluasa po hanalu wao, Godigo aga tau somainogo. Ma, bidi me aga homu dwagi yai eyu bidibawe? Te homu ebo bidi agai te Godibolo wiegi yai homu elama, tęabi po weyu, Godigo nogi ugwaba sao. ¹⁴ Tama dage tomode ama me deli aga te gasi saliwe? Tama tibaso da, agai te Godigo po odobo we bidi tomode bidibo toboli bidi augwali i wao. Tama augwali aselama, augwaligo te Genuai Bidi Jisasgo nogide te bidi tigiba te wel muagasiyu, tama Godigo te gasi sai bidi tau somainu augwaligo Godibolo gedu haluasa po hanalu waibao.ⁿ ¹⁵ Tama augwaligo Godibolo te konealubo po mu dąu olama gedu haluasa po weyu da, te Genuai Bidigo te gasi bidigo gasi usu ilama ma hodolaibao. Tama te gasi bidi agai dwai sę meba yaibaso da, te Genuai Bidigo te dwai sę tigidali sela sawaibao. ¹⁶ Tama tibaso, dagego duga dwai sę yali te duga ama dabebolo pusao, te duga hasi tau somainogo Godibolo te po hanalu wao, te God agai dage dwagi yai ma usu ilemainogo yao. Tama tiyu, te doloba pai bidigo gedu haluasa po wabode bomo elaluyu, tama agai te gedu haluasa po wabogo te we bidi tau sabo sę ebo usu yaibao. ¹⁷ Te

¹ 5:11 Jop 1:21-22; 2:10; Tib 103:8 ^m 5:12 Mat 5:34-37 ⁿ 5:14 Mak 6:13

polobadu bidai bidi nogi Elaija aga doloba pai bidi bidiyu, tama agai gedu haluasa po wabode bomo elaluali. Tama agai Godigo nosali yabo sę po augwalibolo pusuyu bidai. Tiali goli Elaija aga te da tiwai bidi bidai. Tama bidiyu, agai Godibolo gedu haluasa po bomonama wai, te tulubage tuluidali weyu, tama te tulubage dagalude tulisiqbadi kibu be sela olama, tama te polua a naga olama, me badu nogo deli olo bidai.^o ¹⁸Tama nosali agai Godibolo po ma hanalu obadi, tama dagaludu te tulubage tagala palama, tama tulubage tuluyu, te tqde nai ma holai.^p

Godigo po wali pabo tü tagalobo bidi, te dago ma oda sabo po

¹⁹Eno ama dedeo, dage tomode ama me deli agai te Godigo mu po tagalobaso da, tama ama me bidigo te ama ma oda siyu da, ²⁰tama te gasa bidi ma oda sali ama agai koneama te homu yao: tama te bidi mego te dwai sę yali bidi tau siyu, tama te dwai sę yali bidi agai te dwai sę ebo tü tagalama tama te bidi God pageba ma asobaso da, te bidigo te dwai sę yali bidigo mobo ma sai, tama te bidi agai te dwai sę eyu te dwai sęgo aga ela mugobeo. Te dwai sę yali bidi tau sabo kolesagade Godigo te dwai sę ebo bidigo dwai sę hauwa sela sawaibao. Te tama dao.^q